

開放文學 – 神鬼仙俠 – 姜尚伐商 第一回 紂王女媧宮進香

成湯乃黃帝之後，姓子氏。初，帝嚳次妃簡狄祈於高禩，有玄鳥之祥，遂生契。契事唐虞為司徒，教民有功，封於商。傳十三世生太乙，是為成湯。湯聞伊尹耕於有莘之野，而樂堯舜之道，是箇大賢。即時以幣帛，三遣使往聘之，而不敢用，進之於天子。

桀王無道，信讒逐賢，而不能用，復歸之於湯。後桀王日事荒淫，殺直臣關龍逢，眾庶莫敢直言。湯使人哭之，桀王怒，囚湯於夏台。

後湯得釋而歸國，出郊，見人張網四面。

人祝之曰：「從天墜者，從地出者，從四方來者，皆羅吾網！」

湯解其三面，止置一面，更祝曰：「欲左者左，欲右者右，欲高者高，欲下者下；不用命者乃入吾網！」

漢南聞之曰：「湯德至矣！」歸之者四十餘國。

桀惡日暴，民不聊生。伊尹乃相湯伐桀，放桀於南巢。諸侯大會，湯退而就諸侯之位，諸侯皆推湯為天子。於是湯始即位，都於亳。

元年乙未，湯在位，除桀虐政，順民所喜，遠近歸之。因桀無道，大旱七年，成湯祈禱桑林，天降大雨。又以莊山之金鑄幣，救民之命。作樂「大濩」，濩者護也，言湯寬仁大德，能救護生民也。

湯在位十三年而崩，壽百歲，享國六百四十年，傳至商受而止：

紂王乃帝乙之三子，帝乙生三子：長曰微子啟；次曰微子衍；三曰壽王。因帝乙游於御園，領眾文武玩賞牡丹，時飛雲閣塌了一梁，壽王托梁換柱，力大無比。

因此，首相商容、上大夫梅伯、趙啟等上本立東宮，乃立季子壽王為太子。

後帝乙在位三十年而崩，托孤與太師聞仲，隨立壽王為天子，名曰紂王，都朝歌。文有太師聞仲，武有鎮國武成王黃飛虎；文足以安邦，武足以定國。中宮元配皇后姜氏，西宮妃黃氏，馨慶宮妃楊氏；三宮后妃，皆德性貞靜，柔和賢淑。

紂王坐享太平，萬民樂業，風調雨順，國泰民安；四夷拱手，八方賓服，八百鎮諸侯盡朝於商。

四路大諸侯率領八百小諸侯，東伯侯姜桓楚，居於東魯，南伯侯鄂崇禹，西伯侯姬昌，北伯侯崇侯虎；每一鎮諸侯領二百鎮小諸侯，共八百鎮諸侯屬商。

紂王七年，春二月，忽報到朝歌，反了北海七十二路諸侯袁福通等。太師聞仲奉敕征北。

一日，紂王早朝登殿，設聚文武。

天子問當駕官：「有奏章出班，無事朝散。」

只見右班中一人出班，俯伏金階，高擎牙笏，三呼稱臣：「臣商容待罪宰相，執掌朝綱，有事不敢不奏。明日乃三月十五日，女媧娘娘聖誕之辰，請陛下駕臨女媧宮降香。」

王曰：「女媧有何功德，朕輕萬乘而往降香？」

商容奏曰：「女媧娘娘乃上古神女，生有聖德。那時共工氏頭觸不周山，天傾西北，地陷東南。女媧乃採五色石，煉之以補青天，有功於百姓，黎庶立禋祀以報之。此福國庇民之正神，陛下當往行香。」

王曰：「准卿奏章。」

次日天子乘輦，隨帶兩班文武，往女媧宮進香。

駕出朝歌南門，家家焚香設火，戶戶結綵鋪氈。三千鐵騎，八百御林，武成王黃飛虎保駕，滿朝文武隨行。

至女媧宮，天子離輦，上大殿。香焚爐中，文武隨班拜賀畢。

紂王正看此宮殿宇齊整，樓閣豐隆。忽一陣狂風，捲起幔帳，現出女媧聖像。

女媧容貌端麗，瑞彩翻翻，國色天姿，婉然如生。真是蕊宮仙子臨凡，月殿嫦娥下世。

紂王一見，神魂飄蕩，陡起淫心。自思：「朕貴為天子，富有四海，縱有六院三宮，並無有此豔色。」

王曰：「取文房四寶來。」侍駕官忙取將來，獻與紂王。

天子深潤紫毫，在行宮粉壁之上作詩一首：

「鳳鸞寶帳景非常，盡是泥金巧樣粧。曲曲遠山飛翠色；翩翩舞袖映霞裳。

梨花帶雨爭嬌豔；芍藥籠煙聘媚粧。但得妖嬈能舉動，取回長樂侍君王。」

天子作畢，首相商容啟奏曰：「老臣請駕拈香，祈求福德，使萬民樂業，兩順風調，兵火寧息。今陛下作詩褻瀆聖明，毫無虔敬之誠，是獲罪於神聖，非天子巡幸祈請之禮。願主公以水洗之，免天下百姓觀見，傳言聖上無有德政耳。」

王曰：「朕看女媧之容有絕世之姿，因作詩以讚美之，豈有他意？卿毋多言。況孤乃萬乘之尊，留與萬姓觀之，可見娘娘美貌絕世，亦見孤之遺筆耳。」

文武百官默默點首，莫敢誰何，俱鉗口而回。

天子駕回，陞龍德殿，百姓朝賀而散。時逢望辰，三宮妃后朝君：中宮姜后，西宮黃貴妃，馨慶宮楊妃，朝畢而退。

女媧娘娘降誕，三月十五日往火雲宮朝賀伏羲、炎帝、軒轅三聖而回。下得青鸞，坐於寶殿，玉女金童朝禮畢。

娘娘猛抬頭，看見粉壁上詩句。大怒罵曰：「殷受無道昏君，今不畏上天，吟詩褻我！成湯享國六百餘年，氣數已盡。若不與他個報應，不見我的神威。」

即喚碧霞童子，娘娘欲駕青鸞往朝歌一回。

時二位殿下殷郊、殷洪來參謁父王，行禮間，頂上兩道紅光衝天。

娘娘正行時，被此氣擋住雲路。因望下一看，知紂王尚有二十八年氣運，不可造次。

娘娘暫回行宮，心中不悅。喚彩雲童兒把後宮中金葫蘆取來，放在丹墀之下，揭起蘆蓋，用手一指。

葫蘆中有一道白光，其大如線，高四五丈有餘。白光之上，懸出一首旛來，光分五彩，瑞映千條，名曰：「招妖旛」。

不一時，悲風颯颯，慘霧迷漫，陰雲四合。風過數陣，天下群妖俱到行宮聽候法旨。

娘娘分付彩雲：「著各處妖魔且退；只留軒轅墳中三妖伺候。」

三妖進宮參謁，口稱：「娘娘聖壽無疆！」

這三妖一個是千年狐狸精，一個是九頭雉雞精，一個是玉石琵琶精，俯伏丹墀。

娘娘曰：「三妖聽吾密旨：成湯望氣黯然，當失天下；鳳鳴岐山，西周已生聖主。天意已定，氣數使然。你三妖可隱妖形，托身宮院，惑亂君心。俟武王伐紂，以助成功，但切切不可殘害眾生。事成之後，使你等亦成正果。」

娘娘分付已畢，三妖叩頭謝恩，化清風而去。

紂王只因進香之後，看見女媧美貌，朝暮思想，寒暑盡忘，寢食俱廢。每見六院三宮，真如塵飯土羹，不堪諦視。終朝將此事

不放心懷，鬱鬱不樂。

一日駕臨顯慶殿，時有常隨在側。紂王忽然猛省，著奉御宣中諫大夫費仲。

費仲乃紂王之佞臣，自聞太師仲，奉敕平北海，大兵遠征，戍外立功。因此紂王就專寵費仲、尤渾二人。二人朝朝蠱惑聖聰，讒言獻媚，紂王無有不從。

不一時，費仲朝見。

王曰：「朕因女媧宮進香，偶見其顏豔麗，絕世無雙。三宮六院，無當朕意，將如之何？卿有何策，以慰朕懷？」

費仲奏曰：「陛下乃萬乘之尊，富有四海，德配堯、舜，天下之所有，皆屬陛下，何思不得？陛下明日傳一旨，頒行四路諸侯：每一鎮選美女百名以充王庭。何憂天下絕色不入王選乎。」

紂王大悅：「卿所奏甚合朕意，明日早朝發旨。」隨即命駕還宮。